

# 1 Juan

Herusalèm a wòrdu destruí na año A.D. 70. Pa e fecha ei, ya kaba 22 buki di Tèstamènt Nobo a wòrdu skirbí. Anto Spiritu Santu a move den un hòmber pa e skirbi e último sinku buki di Tèstamènt Nobo: apòstel Juan. Juan su kontribushon na Tèstamènt Nobo tabata hopi importante, kompositando un relato di bida di Hesu-Kristu (e Evangelio di Juan), 3 karta (1 Juan, 2 Juan, 3 Juan) i un dokumento ekstensivo tokante profesia (Revelashon).

Tur e otro apòstelnan ya kaba a bai serka nan Señor. Juan tabata e úniko apòstel na bida ainda. El a kohe su pèn i a skirbi ku disernimentu dor ku e tabatin e bentaha di meditá riba e bida i ministerio di Kristu pa hopi año.

Ta parse ku e lapso di tempu entre Juan su skirbimentu di su Evangelio i su promé karta ta basta kòrtiku, kisas no mas ku sinku año. E bukinan ei ta komplementá otro den nan contenido i propositonan (2:28; 5:13; Juan 20:30-31). Algun teólogo asta ta yama 1 Juan “e promé komentario riba e Evangelio di Juan”. E bèrdat históriko presentá den e Evangelio di Juan ta apliká na e kreyente individual den 1 Juan.

Algun studiante di Beibel ta yama 1 Juan e Lugá Santísimo di Tèstamènt Nobo. J. Vernon McGee a bisa: “E buki ta hiba e yu di Dios dor di porta di komunion den kas di e Tata. E ta un karta di *famia*. Pablo su kartanan i tur e otro kartanan (den Tèstamènt Nobo) ta kartanan di iglesia, ma esaki ta un karta di *famia*. I nos mester trat’é asina. Iglesia ta konsistí di kreyentenan ku ta posishoná pa ser bendishoná ‘...*ku tur bendishon spiritual den e lugánan selestial den Cristo* (Eph 1:3). Nos ta duná e posishon ei ora nos ta konfia den Señor Hesu-Kristu. Keriendo den Señor Hesus ta trese nos den e *famia* di Dios. Den e *famia* nos tin un relashon ku por wòrdu kibrá ma por wòrdu restorá ora ‘*nos konfesá nos pikánan.*’ Anto ‘*E ta fiel i hustu pa pordoná nos nos pikánan i pa limpia nos di tur inhustisia* (1 Juan 1:9).

“...Mi ta konvensé ku e karta kòrtiku aki ta mas importante pa kreyentenan den iglesia ku e kartanan na iglesianan. ...Mi amigu, ta *masha* importante pa komprendé e buki chikitu aki.”

## I. OUTOR DI E BUKI

E buki di Echunan ta proveé e trasfondo históriko pa e kartanan di Pablo. Ma esei no ta e kaso ku 1 Juan. Ningun teksto di Skritura ta proveé e trasfondo históriko pa e kartanan di Juan. Ma nos por haña un tiki idea di e trasfondo históriko dor di mira kiko tradishon i lidernan di iglesia antiguo a skirbi.

No por haña nòmber di e outor humano di e buki konosí komo 1 Juan! Ma maske e buki ta skirbí anónimamente, fo’i komienso iglesia konsistentemente a identifká e eskritor komo e apòstel Juan. Iglesia a risibí e karta komo outoritario, sin argumento.

Tin evidensia den e buki i fuera di e buki ku ta indiká ku Juan tabata e outor humano. Nos lo kuminsá ku e evidensia eksterno.

## A. EVIDENSIA EKSTERNO

Maske e outor humano no a identifiká su mes den e karta, testimonio di iglesia antiguo tabata fuerte i konsistente ku e apòstel Juan tabata e eskritor. Tur e siguiente lidernan di iglesia antiguo a usa e karta di 1 Juan i a konsiderá e apòstel Juan e outor:

1. Policarpo (A.D. 65-155)—tabata un disipel di apòstel Juan
2. Papías (A.D. 70-163), obispu di Hierápolis—a biba mes tempu ku Policarpo i tambe tabatin kontakto dirèkt ku apòstel Juan, deskribiendo ei komo un “bos bibu i permanente.”
3. Ireneo (A.D. 130-202)—un disipel di Policarpo. Ireneo tabata obispu di Lyons (A.D. 185-202) i a sita tantu 1 Juan komo 2 Juan, afirmando ku apòstel Juan a skirbi tur dos.
4. Clemente di Alejandría (A.D. 150-215) ku frekuensia a sita 1 Juan i a atribuí e karta na Juan e apòstel.
5. Tertuliano (A.D. 160-220)
6. Canon di Muratori—esaki ta e promé lista konosí di bukinan di Tèstament Nobo, i 1 Juan ta inkluí den e lista.
7. Orígenes (A.D. 184-254)
8. Cipriano di Cartago (A.D. 200?-258)
9. Dionisio di Alejandría (A.D. ?-264)
10. Eusebio (A.D. 263-339) a skirbi den *Historia Eklestiasiko*. Segun 3.24: “Ma e skirbimentunan di Juan, no solamente su evangelio, ma tambe e promé di su kartanan [1 Juan], ta aseptá sin desakuerto tantu awor komo den tempunan antiguo.”
11. Tur e iglesianan griegu i latin a aseptá Juan komo outor di e karta.

## B. EVIDENSIA INTERNO

Ma tin evidensia den e buki mes ku ta indiká ku apòstel Juan ta e eskritor humano:

1. E outor ta afirmá ku e mes tabata un testigu di e bida di Kristu  
Den 1:1-3, e outor a bisa ku e tabata presente huntu ku Hesus.  
E eskritor a skirbi na kristiannan di e di dos generashon. Esaki ta limitá e lista di kandidatonan ku por a skirbi e karta. Juan tabata un di e promé apòstelnan, tabata un di e grupo spesial di Hesus (entre tres apòstel presente na resurekshon di yu muhé di Jairo, riba e Seru di Transfigurashon, mas serka den Hòfi di Gètsemané, èts.), tabata e disipel mas será ku Hesus (e disipel ku Hesus a stima, ku a len riba djE), tabata presente na pia di krus ora Hesus a muri, tabata e promé apòstel na graf ora Hesus a resusitá
2. E stail i vokabulario di 1 Juan ta hopi similar na e lenguahe di e Evangelio di Juan  
Ripará algun similaridat:
  - a. Komienso similar di tur dos buki. E promé versíkulo di e karta ta kòrda nos mes ora di e Evangelio. “*Loke tabata for di prinsipio...*” (1:1). “*Na prinsipio...*” (Juan 1:1).
  - b. Lemanan similar den tur dos buki: Tata, Yu, Spiritu, komienso, Palabra, kere, bida, obedesé, mandamentu, amor, permanesé, bèrdat, Konsoladó.
  - c. Kontestanan similar den tur dos dokumento. Tur dos buki ta presentá kontrastenan kla, sin e di tres alternativa: lus—skuridat; bida—morto; amor—odio; amor pa e Tata—amor pa mundu; bèrdat—mentira; hustisia—inhustisia; yunan di Dios—yunan di diabel; den mundu—no di mundu; konosé Dios—no konosé Dios; tin bida etèrno—no tin bida etèrno.

d. Frasen an similar den tur dos buki. E dos bukinan tin hopi palabra i frase similar. No por haña algun di e frasenan otro kaminda den Tèstament Nobo. Por haña e siguiente frasenan den tur dos dokumento:

Frase	1 Juan	Juan
Alegria wòrdu hasí kompleto	1:4	16:24
Praktiká e bèrdat	1:6	3:21
Kamna den skuridat	1:6; 2:11	8:12; 12:35
Palabra di Dios ta permanesé den boso	2:14	5:38
Yunan di Dios	3:1,2,10; 5:2	1:12; 11:52
Nase di Dios	3:9; 4:7; 5:1,4,18	1:13
Yunan di diabel	3:10	8:44
Mundu ta odia boso	3:13	15:18
Pasa di morto pa bida	3:14	5:24
Hasi e kosnan ku ta agradabel den Su bista	3:22	8:29
Stima otro	3:23	13:34
Spiritu di bèrdat	4:6	14:17; 15:26; 16:13
Yu unigénito	4:9	1:14,18; 3:16,18
Ningun hende no a mira Dios nunca	4:12	1:18
Salbador di mundu	4:14	4:42
Awa i sanger	5:6,8	19:34

e. Siñansa similar den tur dos buki (John MacArthur):

Siñansa	1 Juan	Juan
Dios ta etèrno	1:1	1:1
Hende ku no ta kere ta kamna den skuridat	1:6	12:35
Ora bo kere den Hesus, bo ta obedesé e bèrdat	2:5	8:51
Hende ku no ta kere ta spiritualmente siegu	2:11	9:39-41
Dor di kere den Hesus, hende por konosé e bèrdat	2:21	8:32
Ora bo kere den Hesus bo ta bira un yu di Dios	3:1-2	1:12
Hesus a muri pa kita piká	3:5	1:29
Un tempu kreyentenan tabata yunan di diabel	3:8	8:44
Hende ku no ta kere ta morto	3:14	5:25
Dios ta stima pekadornan pèrdí i a manda Su Yu pa muri pa nan	3:16	10:11
Ora bo kere den Hesus, bo ta den e bèrdat	3:19	18:37
Inkarnashon	4:2	1:14
Kreyentenan tabata un parti di diabel su sistema di mundu malbado	4:5	15:19
Yu unigénito	4:9	3:16
Hesus a muri pa hende por nase di nobo	5:1	3:5-7
Yu di Dios	5:5	20:31
Hesus a muri pa hende por risibí bida etèrno	5:11	3:15-16
Hesus ta e fuente di bida etèrno	5:11	6:35
Por risibí bida etèrno dor di konfia den Hesus	5:13	3:16
Dor di kere den Hesus, hende por konosé Dios	5:20	17:3
Hesus ta bida etèrno	5:20	11:25

3. E outor a skirbi ku un stail di outoritario

E eksritor a demandá obedensia kompleto, sin pregunta di su lektornan sin identifiká su mes (p.e. 4:6). Solamente un apòstel konosí i respetá por skirbi ku outoridat asina sin identifiká su mes. Ta aparentá ku e lektornan a konosé e eskritor i su mensahe asina bon ku no tabata nesario pa menta su nòmber. Pasobra Juan tabata e último apòstel pa sobreviví, su testimonio lo tabata outoritario entre kristiannan di e promé síglo.

John Stott a skirbi: “No tin nada dudoso tokante a manera ku el a skirbi. E no a hala atras di yama sierto klase di hende mentirosonan, gañadónan òf anti-kristu. E ta proveé maneranan pa rekonosé den kua di dos kategoria tur hende ta kai. Segun nan relashon pa ku su tètstnan, òf nan tin Dios òf nan no tin, ni konosé Dios, òf no a nase di Dios òf no tin bida òf ta permanesé den morto, òf ta kamna den skuridat òf ta kamna den lus, òf ta yunan di Dios òf yunan di diabel. E outoridat kategórikò di e eskritòr ta mirá partikularmente den su deklarashonnan di su mandamentunan.”

## II. LEKTORNAN ORIGINAL DI E BUKI

Na ken Juan a skirbi su karta? E ousensia di sitanan for di Tèstament Bieu por indiká ku e lektornan original tabata prinsipalmente paganonan. Ma kiko mas nos por deskubrí den e lektornan?

### A. E LOKALIDAT DI E LEKTORNAN ORIGINAL

Unda e lektornan original a biba?

- Fuera di e Evangelionan, Tèstament Nobo ta proveé masha poko informashon tokante apòstel Juan. Nos sa ku Pedro i Juan tabata huntu ora e hòmber lam a wòrdu kurá i e menasa ku nan a risibí di lidernan hudu (Echunan 3-4). Nos sa tambe ku iglesia di Herusalèm a manda Pedro i Juan na Samaria pa investigá e ministerio di Felipe (Echunan 8:14). Pablo a yama Juan un “*pilar*” di iglesia di Herusalèm (Galationan 2:9).

E siguiente biaha ku Juan ta mensioná den Skritura, e ta un prisoner riba isla di Patmos “*pa motibu di e palabra di Dios i e testimonio di Jesus*” (Revelashon 1:9). Esaki probabelmente a sosodé na aña A.D. 95 òf 96. Juan a skirbi e buki di Revelashon mientras e tabata riba e isla pa e shete iglesianan na e provinsia romano di Asia Menor.

Ma kiko a sosodé meimei di e eventonan ei? Segun skirbimentu di lidernan di iglesia antiguo i tradishon ta proveé informashon:

- Juan a bandoná Herusalèm poko tempu promé ku su destrukshon na aña A.D. 70. Probabelmente el a muda un tempu durante A.D. 65-70. Kisas su ministerio tabata pa ku huduianan di parti sùit di Israel promé.

- Despues, el a muda pa Asia Menor pa ministrá na stat di Efeso i serkania komo obispu di Efeso. Den Revelashon 2-3, Juan a skirbi na shete iglesia: Efeso, Smirna, Pérgamo, Tiatira, Sardis, Filadelfia, Laodisea. Tur e iglesianan aki tabata lokalísá den e area serka di Efeso...iglesianan den e area unda Juan tabata obispu.

- Juan probabelmente a regresá na Efeso na aña A.D. 97 despues di su eksilio na isla di Patmos. Segun tradishon, el a biba na Efeso durante su añanan di biehes.

- Juan tabata e último apòstel pa muri.

Ta probabel ku e último apòstel pa muri a skirbi 1 Juan komo un karta pa tur shete iglesia mensioná den Revelashon 2-3 den su biehes. Esaki no tabata e promé karta asina. Pedro a manda 1 Pedro pa kreyentenan na provinsianan di Ponto, Galasia, Kapadosia, Asia i Bitinia 25-30 aña promé ku skirbimentu di 1 Juan.

### B. E KONDISHON SPIRITUAL DI E LEKTORNAN ORIGINAL

Iglesia di Efeso a wòrdu establese hopi tempu promé ku Juan a inisiá su ministerio einan...hopi aña promé ku el a skirbi e karta aki. Entre esnan ku ya kaba tabatin un ministerio na Efeso tabata Pablo (Echunan 18:19:19-20), Prisila i Akila (Echunan 18:18-19,24-26), Timoteo

(1 Timoteo 1:3), Trófimo (Echunan 21:29), famia di Onesíforo (2 Timoteo 1:16-18; 4:19). Pues, e karta aki no tabata skirbí na kreyentenan nobo. E tabata skirbí na un kongregashon ku ya kaba tabata bon fundá den e fe (2:7,13,18-27; 3:11).

Juan tabatin un relashon hopi será ku nan. Nan tabata e kongregashon ku el a pastoriá. E apòstel a skirbi ku suavedat, kurason di un pastor, ku palabranan di un tata. Juan por tabatin setenta piku aña ora el a skirbi e karta. El a skirbi na su “*yu chikitunan*” (2:1,18,28; 3:7,18; 5:21) i su “*stimánan*” den e fe (3:2,21; 4:1,7,11). Merrill Tenney a skirbi, “E suavedat di e siñansa...no mester ta konfundí ku insiertidat di kreensia òf indesishon teológiko.”

### III. SKIRBIMENTSU DI E BUKI

Laga nos pensa tokante e fecha, sitio i okashon pa skirbimentsu di e karta konosí komo 1 Juan:

#### A. FECHA

Un fecha rasonabel pa skirbimentsu di e buki aki ta mas òf ménos A.D. 90-95. Motibunan ku nos ta yega na e konklushon ei:

- E apòstel ripitidamente ta yama su lektoran “*yu chikitunan*” (2:1,12,28; 3:7,18; 4:4; 5:21). E implikashon ta ku e ta basta aña mas grandi ku nan.
- E karta no ta referí na e persekushon inisiá dor di emperador Domiciano (A.D. 95). Esei por indiká ku Juan a skirbi e karta promé ku e fecha ei.
- E doktrina falsu (gnostisismo) ku Juan a kombati den e karta, talbes tabata kuminsá desaroyá na fin di e promé síglo.
- Juan a skirbi e Evangelio di Juan promé (A.D. 80-90). Burdick ta kalkulá ku por lo ménos 80% di e vèrsikulonan den 1 Juan ta reflehá konseptonan haña den e Evangelio di Juan. Manera nos a opservá kaba, algun estudiante di Beibel ta yama 1 Juan e promé komentario di e Evangelio di Juan.

#### B. SITIO

Maske e karta no ta duna indikashon unda e apòstel tabata ora el a skirbi e buki aki, ta probabel ku Juan a skirbi na Efeso. Nos ta yega na e konklushon aki pasobra e karta tabata skirbí den e último añanan di Juan su bida i di loke nos sa, Juan a biba na Efeso durante e último añanan di su bida,

#### C. OKASHON

Apòstel Pablo a funda e iglesia di Efeso (Echunan 19). Durante su último bishita relatá den Skritura ku e lidernan di iglesia di Efeso, Pablo a avisá nan ku siñadónan falsu lo bin—for di pafó di iglesia òf for di e kongregashon mes (Echunan 20:28-31). Esei ta presis loke a sosodé. Awor, e apòstel ansiano, sirbiendo komo supervisor di e iglesianan den e area ei, tabata na altura ku doktrina falsu tabata desaroyá entre miembronan di iglesia.

Kiko nan a kere? Nan a nenga ku Hesus tabata Kristu, e Yu di Dios (2:22; 5:1,5). Nan a nenga ku Kristu a bin na mundu den un kurpa físiko (4:2). Nan a nenga e outoridat di Hesus Su mandamentunan (2:4). Nan a nenga ku nan ta pekadó (1:8,10). (Ta parse ku nan a kere ku e evangelio ta libra nan for di e poder di piká [1:8].) Nan a nenga ku salbashon ta ofresé dor di e obra ku Kristu (2:2). Nan a nenga ku kristiannan mester stima otro (2:9). Nan a nenga ku kondukta rekto ta un rekisito pa komunión ku Dios (1:6; 2:29; 3:6,10). Nan a nenga nan responsabilidat pa biba manera Hesus a biba (2:4,6; 3:7). Nan a nenga e outoridat di Juan (1:5).

Nan a kere ku esnan ku no a sigui nan no tabata den e bèrdat (2:20-21). Nan a kere den e unguentu di Spiriu (2:20,27). Nan a kere den diabel komo un ser kontra Dios (3:8-10; 4:2-3).

Kiko tabata resultado di e siñansa aki den e iglesianan? Algun miembro i siñadónan a separá for di otro kristiannan (2:18-19) i a inisiá nan mes gruponan (2:19). Nan a mantené kontakto ku otro kreyente ku e proposito pa purba hala nan pa djòin nan grupo nobo (2:26). Juan a skirbi e karta kòrtiku aki pa kombati e siñansa falsu i pa enkurashá e bèrdadero kreyentenan.

Ta parse ku e siñansa falsu tabata ligá ku otro siñansa falsu. Kiko tabata e siñansa ei? Algun pusibilidad ta, 1) komienso di gnostisismo, 2) doktrina falsu di Dosetismo, 3) siñansa di Cerinto, 4) un doktrina falsu lokal, òf 5) un kombinashon di algun di e siñansanan aki. Nos no sa sigur.

E doktrina falsu sigur a lora rònt di e identidat di Hesu-Kristu. Nan a nenga ku Hesus ta e Yu di Dios den karni (2:22; 5:1; 4:2-3). E doktrina a rechasá e union di dos naturalesa (humano i divino) den un persona.

Tabatin diferente forma di gnostisismo. 1) E gnostisismo original a nenga kere ku Hesus por tin un naturalesa humano i divino na mesun tempu pasobra nan a kere ku loke ta spiritual ta bon i loke ta material ta malu. Pues, kon Hesu-Kristu por ta humano? 2) Gnostisismo di Dosetismo a siña ku Kristu solamente a *parse* humano, ma E no tabata un hòmer humano. Su aparenzia tabata manera un teofania (kristofania) den Tèstament Bieu. 3) Gnostisismo di Cerinto a siña ku Hesus i Kristu tabata dos identidat distinto. Hesus tabata e yu humano di Jose i Maria ...un bon hende. Spiritu di e Kristu divino a baha riba e hòmer Hesus na Su boutismo, a biba den dje durante Su ministerio, i a bandon'E poko promé ku e krusifikashon. Di tal forma, Hesus so a muri riba krus—no Hesu-Kristu. Tur tres di e doktrinanan aki ta ataká e naturalesa di e persona di Kristu, ta ataká e inkarnashon di Kristu, i na un forma indirèkt ta ataká e balor di Su propisiasion.

Robert Gromacki a skirbi, “Fuera di e echu ku e kristiannan individual tabata enfrentá un atake doktrinal, nan tambe tabata den un kondishon malu spiritual. Nan tabatin un tendensia pa ta mundano (1:5-2:6; 2:15-17), nan a falta amor pa e rumannan i no a hasi kaso di nan nesesidatnan físiko (2:7-11; 3:13-24), nan a falta siguridat di salbashon personal (5:13). Ireneo a haña ku e erornan aki di flohera moral a originá for di e nikolaitanan, (siñansa ku a originá ku Nicolas (Ac 6:5; Rev 2:14-15).”

Ku hopi preokupashon pa motibu di e kanser spiritual ku tabata infektá iglesia den su area di influensia, Juan a skirbi su karta. Juan a kombati esaki ku suavedat i amor, ma ku outoridat kla di apòstel.

Juan a proveé tres prueba i rekisito pa komunión bèrdadero ku Dios—tres kriteria pa dedusí si un profeshon kristian ta genuino. 1) Doktrina korekto—rekonosiendo ku Hesu-Kristu a bin den karni (4:2). Esta, rekonosiendo ku Hesus ta e Kristu (2:22; 5:1). 2) Moralidat korekto—bidanan rekto. 3) Aktitutnan korekto—amor pa otro kreyentenan. Dor di duna e rekisitonan aki, Juan a informá e kreyentenan ku nan por distinguí entre loke ta bèrdat i loke ta falsu i a enkurashá nan pa mantené komunión.

#### **IV. PROPOSITO DI E BUKI**

Nos por saka afó diferente proposito ku Juan tabatin pa skirbi e buki:

##### **A. PROPOSITONAN MENSHONÁ DEN E KARTA**

Den e buki, Juan a introdusí sinku proposito prinsipal ku palabranan manera , “*E kosnan aki nos ta skirbi boso...*” (1:3,4; 2:1,26; 5:13). Kiko ta e propositonan ei? 1) Pa promové komunion spiritual (1:3). 2) Pa produsí alegría (1:4). 3) Pa avisá kontra piká (2:1). 4) Pa spierta kontra siñadónan falsu (2:26). 5) Pa proveé siguransa di bida etèrno (5:13).

## **B. PUSÍBEL PROPOSITONAN**

Ma nos por mensioná algun otro pusibel proposito. 1) Pa presentá e realidat físiko di Kristu Su kurpa inkarná (1:1-4). 2) Pa demonstrá e relashon entre piká i e kreyente (1:5-2:6). 3) Pa enfatisá e nesesidat di amor pa rumannan den Kristu (2:7-11; 4:7-21). 4) Pa apelá pa separashon for di mundu (2:12-17). 5) Pa avisá kontra siñadónan falsu (2:18-29). 6) Pa enkurashá puresa moral (3:1-12). 7) Pa presentá evidensianan ku lo demonstrá e realidat di salbashon personal (3:13-24). 8) Pa mostra kon pa distinguí entre bèrdat i eror (4:1-6). 9) Pa mostra e resultadonan di fe den Kristu (5:1-12). 10) Pa duna siguransa di salbashon (5:13-21).

## **V. OPSERVASHONAN DI E BUKI**

Nos ke mira vários karakteristiká di e buki:

### **A. E KARTA TA FALTA E KARAKTERISTIKANAN NORMAL DI UN KARTA**

E outor klaramente a bisa ku e ta skirbi un karta (1:4; 2:7,8,12,13,14,21,26; 5:13). Ma e karta aki ta diferente. Un karta usual di Testamènt Nobo tin un introdukshon, ta indiká na ken e outor ta skirbi, ta kontené e saludo di e outor, tin un konklushon i kumindamentu. Ma e karta aki no ta sigui e patronchi ei. Talbes nos por bisa ku 1 Juan tabata un sermon verbal. E tabata un komposishon por eskrito—un karta skirbí komo un sermon.

### **B. E LEMANAN PRINSIPAL DI E KARTA**

Diferente lema prinsipal ta resaltá den e karta:

#### **1. Siguransa**

Un òf otro forma di e palabranan “*nos sa*” ta aparesé 13 biaha den e buki (2:3,5,29; 3:14,16,19,24; 4:13,16; 5:15,18,19,20). Ademas, forman di e verbo “*pa sa*” ta aparesé por lo ménos 40 biaha den e karta.

E Evangelio di Juan tabata skirbí pa enkurashá fe i bida den e lektor (Juan 20:31). E karta di Juan tabata skirbí pa duna siguransa di fe i poseshon di bida etèrno (5:13). Esaki ta un bon buki pa lesa ora un persona ta lucha ku siguransa di salbashon.

#### **2. Komunion (1:3-7)**

Nos lo mira esaki mas djaserka ora nos ta mira struktura di e buki.

#### **3. Piká**

Un otro palabra prinsipal den e karta ta “*piká*” (1:7,8,9,10; 2:1,2,12; 3:4,5,6,8,9; 4:10; 5:16,17,18). E palabra griegu pa piká, *HAMARTIA*, literalmente ta nifiká “*pa falta e marka*”.

Juan ta papia di un tipo di piká ku hende por “*rekuperá*” for di dje i un otro tipo di piká for di kua hende no por “*rekuperá*”. Su lektornan a komprendé e diferensia. Si un hende ta insistí pa sigui doktrina falsu (nengando e identidat bèrdat di Hesus), esei ta guia na piká for di kua no por repentí, loke ta produsí morto spiritual.

### **C. E STAIL DI E KARTA**

Lo siguiente ta algun opservashon tokante e stail ku kua Juan a skirbi su karta:

- Simplisidat di stail i vokabulario

Juan su skirbimentu no ta skirbimentu di un eskritor eksperto. E ta usa palabranan simpel—un vokabulario no-kompliká. Kompará ku otro kartanan den Tèstamènt Nobo, su vokabulario ta limitá. Presis manera e Evangelio di Juan, 1 Juan ta skirbí ku un stail i vokabulario simpel.

- Deklarashonnan ta kortiku i kla.
- Juan no a skirbi na un forma pa argumentá—manera Pablo a hasi. E no ta presentá pensamentunan lógiko un tras di otro pa proba sierto konklushon. Su stail a parse mas bien di un persona ku a skirbi su pensamentunan den purá—maske esei no ta e kaso.
  - Juan ta usa kontrastenan. E ta usa kontrastenan pa enfatisá su siñansa.
  - Ripitishon ta importante pa Juan. Ta parse ku su ideanan ta poko, ma e ta ripití nan diferente biaha.
  - Paralelismo. Por nota tres ripitishon paralel den 1:8-10. Tambe tin kuater ripitishon ku frasenan paralel den 2:12-14.

## **D. OUTOR DI E KARTA TABATA UN PERSONA KATEGÓRIKO**

Ku frekuensia Pablo a inkluí eksepsionnan ora el a diskutí prinsipionan spiritual (p.e. kiko si mi ta frakasá). Ma fuera di 1:8-2:1, Juan su karta ta kategórik. Tur kos ta òf pretu, òf blanku—nada shinishi. Manera nos a mira kaba, tin hopi paralelismo di kontraste: lus—skuridat (1:5,7; 2:8-11); bèrdat—mentira (2:21-22; 4:1); yunan di Dios—yunan di diabel (3:10); amor pa mundu—amor pa e Tata (2:15); Kristu—anti-kristu (2:22); Spiritu di Dios—spiritu di anti-kristu; bida—morto; rektitut—inhustisia; amor—odio; si bo tin e Yu, bo tin bida eterno—si bo no tin e Yu, bo no tin bida eterno (5:12).

Juan su énfasis ta, esnan ku ta bisa ku nan ta kristian mester reflehá karakteristikanan di kristiannan genuino: doktrina sano, obedensia, amor. Si bo di bèrdat a nase di nobo, biba asina! Juan ta demandá ku kristiannan mester biba na un banda òf otro di e liña—bo no por tin un pia den mundu i un pia pa Señor. Si bo no ta reflehá karakteristikanan di kristianismo genuino, nunca bo a nase di nobo di bèrdat!

Atrobe nos mester bisa ku e apòstel a skirbi ku outoridat, deklarando e bèrdat na un forma kategórik i severamente denunsiando eror. Ma e ta hasi tur esaki ku un spiritu di amor.

## **E. OUTOR DI E KARTA A USA RIPITISHON**

Juan a ripití lemanan similar bes tras bes pa enfatisá bèrdat básiko di kristianismo. Merrill Tenney a skribi, “Un Juan ta un orkesta na lugá di un plan lógiko. E karta ta konstruí manera músika na lugá di un debate kortiku. Na lugá di prosedé paso pa paso ku un lema, manera Pablo a hasi den Romanonan, Juan a selektá un lema i ta mantené esei dor di henter e buki, i ta introdusí un serie di variashon. Kualke di e variashonnan por ta un lema riba su mes. Pa e motibu aki, ta difisil pa sigui su liña di pensamentu den e Evangelio i den e karta, i purbando pa haña un struktura progresivo ta asta mas kompliká.”

Algun teólogo ta kompará Juan su stail di keda ripití komo un spiral ku ta hancha ku kada siklo, plamanda e bèrdat riba un teritorio mas amplio, afektando mas area di bida. Otro estudiante di Beibel ta mira e spiralnan birando ménos hanchu, penetrando mas i mas profundo den e mesun lema, mientras e ta ekspandé su pensamentunan. Klaramente tur dos perspektiva ta haña ku Juan a usa ripitishon di bèrdat básiko komo un hèrmènt importante pa yuda su lektornan komprendé.

Nos por konkluí ku probabelmente si bo ta gusta skirbi loke un predikadó ta bisa, lo ta difisil pa skirbi ora Juan a prediká!



## **F. E KARTA NUNKA TA SITA TÈSTAMÈNT BIEU**

Ningun teksto di Tèstamènt Bieu ta sitá den 1 Juan. Solamente un evento den Tèstamènt Bieu ta mensioná (Cain – 3:12). Esaki probabelmente ta indiká ku e kongregashonnan na kende Juan a dirigí su karta tabata prinsipalmente pagano, no hudiunan.

## **VI. STRUKTURA DI E BUKI**

Ta hopi difísil pa forma un skema di e karta aki pasobra Juan no ta pasa for di un tópiko pa otro. Den algun parti di 1 Juan e struktura ta hopi detayá. Ma den otro parti di e buki, e pensamentunan ta parse deskonektá òf asta bruhá. Di bèrdat, Juan ta flègt vários tema dor di henter e buki. Por ehèmpel, Juan ta elaborá riba e konseptonan di amor, obediensia, siguransa i fe banda di otro.

Pues tin diferente manera pa mira struktura di e buki:

### **A. STRUKTURANAN KU FOKO RIBA NATURALESA DI DIOS**

Esnan ku tin e perspektiva aki ta haña ku Juan a organisá su pensamentunan rònt di tres pensamentu tokante Dios...ku spiertamentunan lógiko resultado for di esaki:

- I. Dios ta lus (1:5)...kamna den lus
- II. Dios ta bida (2:25)...biba Dios Su bida
- III. Dios ta amor (4:8)...permanesé den amor

E siguiete skema di P.R. Jones ta desaroyá riba e konsepto aki:

- Prólogo – 1:1-4
- I. Dios ta Lus – 1:5-2:27
  - II. Dios ta Rekto – 2:28-4:6
  - III. Dios ta Amor – 4:7-5:12
- Epílogo – 5:13-21

### **B. STRUKTURANAN KU FOKO RIBA SÍKLONAN**

Akun studiante di Beibel ta kere ku e eskritor humano no a trata ku un tópiko, sigui pa un otro tópiko, anto pasa pa e di tres tópiko, èts. Segun nan punto di bista, Juan a trata ku diferente tópiko ripitidamente...den síklonan.

R. Law tin un skema ku ta basá riba e pensamentu aki di spiral:

- Prólogo – 1:1-4
- I. Promé Síklo – 1:5-2:28
  - II. Di Dos Síklo – 2:29-4:6
  - III. Di Tres Síklo – 4:7-5:21

John MacArthur ta sigui e pensamentu aki—basando e síklonan riba e lema di komunion:

- I. E Tèst Fundamental di Komunion Genuino—Spiral 1 – 1:1-2:17
  - A. E Tèst Fundamental Doktrinal – 1:1-2:2
  - B. E Tèst Fundamental Moral – 2:3-17
- II. E Tèst Fundamental di Komunion Genuino—Spiral 2 – 2:18-3:24
  - A. Parti 2 di e Tèst Doktrinal – 2:18-27
  - B. Parti 2 di e Tèst Moral – 2:28-3:24
- III. E Tèst Fundamental di Komunion Genuino—Spiral 3 – 4:1-21

- A. Parti 3 di e Tèst Doktrinal – 4:1-6
- B. Parti 3 di e Tèst Moral – 4:7-21
- IV. E Tèst Fundamental di Komunion Genuino—Spiral 4 – 5:1-21
  - A. E Bida Viktorioso den Kristu – 5:1-5
  - B. E Testigu di Dios pa Kristu – 5:6-12
  - C. Siguridatnan Kristian pa motibu di Kristu – 5:13-21

### C. STRUKTURA KU FOKO RIBA LEMANAN

Algun studiante di Beibel tòg ta purba desaroyá un skema di 1 Juan ku foko riba un lema. Lo siguiente ta algun ehèmpel:

#### 1. E Lema di Siguransa

Skema di Robert Gromacki:

- Prólogo – 1:1-4
- I. Fundeshi Moral di Juan Su Mensahe – 1:5-2:2
- II. Tèstnan di Siguransa Introdusí – 2:3-27
- III. Tèstnan di Siguransa Desaroyá – 2:28-4:6
- IV. Tèstnan di Siguransa Repasá – 4:7-5:5
- V. Tèstgunan di Siguransa – 5:6-17
- VI. Resumen di Siguransa – 5:18-21

Skema di Merrill Tenney:

- Lema: E Siguransa di Bida Eètèrno
- I. Introdukshon: E Manifestashon Historiko di Bida – 1:1-4
- II. Siguransa dor di Kamna den Lus – 1:5-2:29
- III. Siguransa dor di Permanesé den Amor – 3:1-4:21
- IV. Siguransa dor di Ehersé Fe – 5:1-12
- V. Konklushon: Siertedatnan di Bida ku ta Resultá – 5:13-21

#### 2. E Lema di Komunion

Skema di Bruce Wilkinson:

- I. Parti Un: E Fundeshi pa Komunion – 1:1 – 2:27
  - A. Introdukshon – 1:1-4
  - B. E Kondishonnan pa Komunion – 1:5 – 2:11
  - C. E Peligernan di Komunion – 2:15-27
- II. Parti Dos: E Komporthashon di Komunion – 2:28-5:21
  - A. Karakteristikanan di Komunion – 2:28-5:3
  - B. Konsekuensianan di Komunion – 5:4-21

Skema di Glenn W. Barker:

- I. Prólogo – 1:1-4
- II. Rekisitonan pa Komunion ku Dios Kende ta Lus – 1:5-2:28
- III. Rekisitonan pa Komunion ku Dios Kende ta Rektitut – 2:29-4:6
- IV. Rekisitonan pa Komunion ku Dios Kende ta Amor – 4:7-5:12
- V. Remarkenan pa Konkluí – 5:13-21

## Literatura Konsultá

- Barker, Glenn W. "1 Juan". Gaebelien Frank E., *The Expositor's Bible Commentary* (Grand Rapids: MI: Zondervan Publishing House, 1981), vol. 12, p. 291-305.
- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 178-179.
- Drumwright, H. L. Jr. "Juan the Epistles of". *The Zondervan Pictorial Encyclopedia of the Bible* (Grand Rapids: MI: Zondervan, 1976), vol. 3, p. 648-652.
- Gromacki, Robert G. *Tèstamènt Nobo Survey* (Baker Book House: Grand Rapids, Michigan, 1974, 1981 printing), p. 368-372.
- Gundry, Robert H. *A Survey of the Tèstamènt Nobo* (Grand Rapids, MI: Zondervan Publishing House, 1970), p. 338-340.
- Jensen, Irving L. *Jensen's Survey of the Tèstamènt Nobo* (Chicago, IL: Moody Press, 1981), p. 460-476.
- McArthur, Juan. *MacArthur Quick Reference Guide to the Bible* (W Publishing Group a division of Thomas Nelson Inc.: Nashville, 2001), p. 316-321.
- McArthur, Juan. *The MacArthur Tèstamènt Nobo Commentary: 1-3 Juan* (Chicago, IL: Moody Publishers, 2007), p. 1-11.
- McGee, J. Vernon. *Thru the Bible* (Nashville, TN: Thomas Nelson Publishers, 1983), vol. 5, p. 753-755.
- Miller, Adam W. *Brief Introduction to the Tèstamènt Bieu* (Anderson, Indiana: Warner Press, 1964).
- Poehnell, Gray. *Tèstamènt Nobo Survey class handouts* (Prairie Bible Institute: Three Hills, Alberta, Canada, 1983).
- Tenney, Merrill C. *Tèstamènt Nobo Survey* (Grand Rapids, MI: Wm. B. Eerdmans Publishing Co, 1961), p. 375-381.
- Wilkinson, Bruce & Boa, Kenneth, *Talk Thru the Bible* (Nashville, TN: Thomas Nelson Publishers, 2002), p. 483-489.